


丹陽縣志

ル 5
3284
8



門 凡 5
號 3284
卷 8

丹陽縣志卷二十三

丹陽縣志卷二十三

隱逸

易曰不事王侯高尚其志孔子曰賢者避世必其人
遺世獨立超然塵垢之表乃克當之否則勝國遺民
恥事二姓終身韜晦有足多焉若僅山澤之癯棲身
物外識者鮮不嗤為充隱矣志隱逸第二十一

漢

孫鍾隱居不仕種瓜於縣西白鶴山死即葬其地堅父
也其踪跡顯末人莫能窺今每歲三月十五日有司
致祭於其祠墓

昭和十八年
八月十八日
購求

梁

蕭昉素思話孫初遊京口便有終焉之志築室攝山會徵爲中書辭不就還山獨居非親屬不得至其門

唐

周惟長號橫山處士李白有詩贈之云周子橫山隱開門臨城隅連峯入戶牖勝概凌方壺時吟白苧詞放歌丹陽湖水色傲溟渤川光秀菰蒲當其得意時心與天壤俱閒雲隨舒卷安議身有無抱石恥獻玉沈泉笑探珠羽化如可作攜手上青都

張彥雄張潮元詵殷璠陸橋李元正湯清源俱隱居不仕

周孝寰耆壽高隱見李華練湖頌

沈彬高安人隱居丹陽喜賦詩南唐主授以校書郎懇求還山以尙書致仕

殷懌字易從少負志氣博學善屬文天寶末知天下將亂隱居吳門不仕

宋

邵餗字之心范仲淹守潤嘗薦之不報仲淹自潤移越道過之致書云今春與張侍御過丹陽約詣先生維舟水邊聞先生歸山所謂其室則邇其人甚遠惘然

愧薄宦之不高矣

邵彥字君美治平四年進士第爲淮陽軍下邳簿調眞州揚子尉以病去上官不能留歸老於鄉或有勸其仕者謝曰泰而拘約而肆以此易彼予未知所得能償所亡也言者慚而退自號練塘眞隱因以名其集孫衍字彥淵五季之世高尙不仕宋興詔徵天下賢良遺佚之士有司以衍應詔授光祿寺丞未幾告歸

蘇庠字養直與東湖徐俯相厚俯在樞近薦於上再以疾辭詔旨督促就道庠聞命扁舟遠引終莫能致天下高其節好事者往往圖其形以相贈遺

蘇扶庠之子工詩嗜書酷肖其父家貧郡守招之語子弟曰吾何以獲知斯人特以先世名存哀其貧而周之耳安忍以吾父名賣錢耶固辭不往死無以斂門人葬之

蘇京字世美頌次子通判沂州一日覽二疏事喟然感嘆投劾而歸遂不仕政和七年四月終於家葬丹徒長岡游酢誌其墓

蘇炤字元晦頌曾孫隱居不仕築圃建堂藏修其中自號東山樵隱博學工詩趙璠老以遺逸薦不赴時相書滄浪二字遺之

吳瑛字德仁遵路子以蔭入官至虞部員外郎通判池黃二州知郴州年四十六上書致仕有田僅足自給臨溪築室種花釀酒家事悉付子弟人莫不敬其高尚哲宗朝有薦之者召爲吏部郎不赴卒年八十四陳輔字輔之其先自九江移居丹陽少負俊才不屑事科舉文詞雄偉不蹈故常尤工於詩自號南郭子人稱南郭先生與王介甫善介甫執政絕迹不通孤介寡合不仕不娶古獨行君子也蘇軾鄒浩蔡肇沈括皆與之遊

湯喬年字壽隆東野侄淳熙中朝論以學校前輩惟喬年與魯秉禮二人將俾學官上其名喬年知而謝曰吾結髮事科舉誓不以僥倖進若爾二十年前附秦丞相久爲中書舍人矣議遂寢晚以對策入等授韶州推官不赴老於家

翟耆年字伯壽以父汝文任入官好古文編介不苟合自謂爲吏必以顛黜棄官歸放浪山水間著書自娛宰相范宗尹欲召之蘇庠曰翟子清濁大明善惡太分此張忠惠所以不能取容當世也不如遂之以成其高乃止

郭雍字隱濱邃於理學徵召不起號沖晦處士孝宗時

重刊陽明志 卷之三 四
賜號頤正先生

孫謨字子猷元祐癸酉解元一試春官不第遂不復出
隱居倪山闢精舍以講學執贄受經者不遠千里而
至

孫林字叔芳謨嫡孫紹興乙卯解元祖孫皆鄉舉第一
當世榮之有司餞送赴部林以執政者非人度不能
伸其志欲弗行爲縣官所敦迫乃言曰此行聖門之
罪人也既就試對策極言時政之失考官得其卷以
爲劉蕢復生顧扼於執政不敢薦放歸人皆稱屈林
欣然曰此吾志耳讀書味道之暇與騷人墨士嘯傲

林壑間絕口不談時事朝廷聞其賢徵爲秘閣侍書
辭不赴

貢子仁字壽卿號遠山宋德祐時官金壇教諭早負神
童之望博學工詩一時名士如韋援方回皆推重之
入元遂隱居以琴書自樂

貢宗舒字致仲號柳隱居士遠山之子入元兩世高隱
不仕嘗自題柳隱圖云垂楊過我屋頭青門對茅峯
遠世情贏得行人閒着眼卻疑此處卽淵明
諸葛舜臣字用中簡敏公後裔家資鉅萬入元隱居茅
山終身不仕自號清微觀主

元

虞薦發元末鄉貢遷居常州操行狷介不偶流俗

潘嘉宋代遺民入元不仕宋詩紀事有經賈秋壑故第

詩云夢迷葛嶺酣歌夜鬼哭樊城血戰秋其感慨深

矣

汪泗字宗之隱居好學不樂仕進

蔣填字子珉號桐隱居士

明

宦椿字可齡工詩號鳳山樵隱

潘遵字遵道永樂中以薦為堂邑丞未期年謝歸築練

塘書院日吟嘯其中遊佳山水輒數年不返

陸思孟字希賢自號遺安翁隱居樂道張性中為作記

蔣山人逸其名孫宏孝有過呂城懷蔣山人詩

蔡德濟字信心號具舟天啓時拔貢生授浙江仁和令

未赴任即投牒歸以泉石自娛

孫宏孝字仁甫號虛白布衣以節自高與同邑楊爾誠

睦修年虞他山結詩社京口耆舊傳稱為徐元歎一

流人

蔣惺字靜存邑文生築野宜園於小東門水關右娛情

詩酒以終自題野宜園詩云踏雲先得路問月更登

樓其閒散之致可見

楊志達字爾誠邑文生慷慨負氣節崇禎甲申聞變赴水死為漁人所拯遂高臥李家山架木為樓題曰安樓因以自號葛巾野服終身不入城市留溪外集有安樓先生傳

眭思永字修年號身壹明永之弟邑文生工詩善畫隱居曲陽山終身不入城市

周士甲字元甫號逸齋邑文生素敦信義重然諾見明政日非無志功名隱居華甸寄情詩酒足跡不入城市當時高其志節

國朝

於之亮字隱湖號藥圃邑文生嘗遊史閣部軍中充左翼參謀甲申後隱於醫絕口不談時事邑人賀拓庵寬為之立傳

劉元祥字瑞甫鄉貢生名噪成均因明季朝政日非歸隱湖濱日與邑中名士飲酒賦詩寄情泉壑以老

賀巽字申如號孤村布衣喜讀書不習舉子業嘗曰吾不獲事二人矣何役役名利為執友王虛舟澍王己山步青知其學問勸以進取曰非吾志也與人言孝友事輒津津樂道以高隱終

湯志泗字魯濱布衣為虞原博詩弟子工吟咏蒔花問竹高隱終身有山居詩見志

汪兆麟字聖徵博學幽潛不求聞譽有左傳全集分門類敘為後學津梁其易簣時有詩云心存腔子裏性養自然天內省能無疚工夫豈偶然可知其素行矣東敬字子居布衣為人古貌古心自安樸素然能博覽載籍說古事舉僻典如數掌上螺少嘗一應有司試不售遂高隱以終

荆琢號素庵康熙乙未歲貢與東昌霖金沙王詒燕王紀同潛心於古高才不遇江左稱為四逸民補遺

方技

方術巧藝自古有之自太史公為日者龜策倉公扁鵲立傳而後世以方技名者乃代有其人陽邑如張田之相蔣曉之醫尚已他有以一藝鳴者罔不詳著於篇小道可觀其亦有以資考鏡也志方技第二十二

漢

沈建世為吏建獨好道管遠行寄僕婢於友家各與藥一丸不復食建還更與藥乃食

梁

蕭子雲通音律普通中敕訂三朝雅樂製俊雅三曲介
雅三曲雍雅三曲需雅八曲允雅寅雅各一曲又製
相和引按宮商角徵羽爲五曲

宋

蔡肇字天啓工山水人物尤好作枯槎老樹怪石奔湍
慈濟神濟普甯寺僧遇神仙桑君授墨錫丹方洞明醫
道察脈如神遂以醫名天下宣政炎紹間名公以詩
文褒美者甚眾其徒道源傳其術嘉定中志恭永全
尙世其業

賀懋燧字五良邑廩生精詞曲嘗仿柳屯田曉風殘月

之句寫紫釵令傳奇一時詞人皆賞之

虞玉字玉樹布衣詩古文辭外尤精音律奉御樂工馬
方嘗就玉訂誤焉

明

潘鳳字楫山工六法山水人物宗馬遠夏圭蒼老秀逸
超出谿徑之外又有巧思嘗隨楊文襄一清至雲南
見料絲燈歸而鍊石成絲如式仿製於是陽邑料絲
燈聞於海內

蔣守成字繼之號曉山畫法趙千里吳仲圭與文衡山
父子相友善繪事出入衡山惜傳世甚少

王元字又元見潘梧山所製料絲燈巧翻新樣始於燈
上作參差凹凸狀山水人物一一精妙周宜與極稱
賞之呼為王燈

張田工相術一日與客語鄰舍兒有還其所負者田反
其金而速之去客怪之田曰是兒當命盡此時因逆
計曰不過太尉廟兒至太尉廟果蹶死偶晨起視鏡
曰吾家居當及禍遂之九里廟避之見神像即走出
曰神禍甚於我未三日而廟焚田子故業賈將渡江
與販田飲之酒婦怪其珍美異平時田曰兒去當墮
水死父子恩甯不訣別耶婦曰盍止之田曰數也可

逃乎婦不聽而止之未幾失足水中溺死其神異多
此類田相術爾之清道人約勿他授其術不傳

蔣曉字東明世業醫偶有黃冠賣卜於市者自稱味元
子曉從之遊得其保幼一編治疾奇驗有王生者子
週歲忽不乳食肌月盡削醫疑為疳曉曰此相思症
也眾皆嗤笑之曉命取兒平時玩弄之物悉陳於前
有小木魚兒一見喜笑疾遂已

國朝

蔣我占性聰慧讀書未就以寫真為業為人寫照意與
神合呼之欲出一時名動公卿不惜千金致之我占

悉以給諸弟及族人之不足者

汪可爵字君錫精易數著有易學驪珠道行京口時號半仙

姜可正善卜嘗問卜於關聖帝前笞擲入案下尋之得異書一冊遂徙業焉問以吉凶無不響應

蔣清號容庵崇禎時諸生國變後高臥不起工書善畫寫蘭竹文石秀骨楚楚

湯周鼎號拙齋谷賓之姪布衣善畫草蟲翎毛花卉設色古雅深得南田翁筆法

吳期遠字子遠號西潭布衣工詩善山水榜所居曰安

樂窩魏叔子爲之記謂其畫筆純乎篆意時手莫能抗行秦逸芬桐陰論畫亦謂其追摹一峰老人頗得妙境

賀清時字與文號可齋善山水亦工花卉

張伯駿字範我冢宰赤函之子博雅好古寫山水宗勝

國名家翛然神遠

馬圖字瑞卿以寫照著名兼能人物山水

姜彥初一名鶴儕三歲授以唐詩卽能成誦年十七補

博士弟子員泚筆作山水小景頗具倪黃邱壑蓋不

學而能也

許濱字江門善畫窠石水仙薄冰殘雪時見嫣然趙子
固九十三峯畫法江門深得之

張懋準字君度邑文生好藏書精篆刻家雄於貲積書
四萬卷藏蛾術齋中其縹籤鈐記色色精絕彙之可
爲印譜皆自鑄也

范榕字埜君太學生工詩善畫鐵筆尤入神品遊公卿
間胡雲坡制府范傳齋都督嘗謂得其凍章一方可
當韓陵片石

張鑣號蘭田太學生工吟咏尤善鼓琴指法得松風閣
精處遊朱子穎都轉署中著論琴十絕見賞於袁簡

齋太史程荆南大令爲梓而傳之其後東佩堂南紀
姜湘浦景華亦嫻勾撥廣陵散於今絕矣

柴心標字東臯善畫山水蕭疏澹遠在倪雲林王石谷
之間續畫徵錄推爲逸品

馬嘉駿善畫蒲萄潑墨淋漓奇恣天矯不可方物人以
馬蒲萄稱之同時吉庶常士瑛善畫松睦修年思永
工寫竹有吉松睦竹馬蒲萄之諺

蔡嘉字松原花卉翎毛宗法惲壽平著聲江淮間
蔣璋字鐵琴善畫與黃瘦瓢齊名時謂蔣派

張豈凡官州佐材武任俠以宜僚劍術見重於年大將

軍而能知機以免禍乾隆丁酉南巡進獻詩冊論者目爲淮海異人

詹思益精於幼科著詹氏痘科書吳門葉天士桂嘗採其說入臨症指南

荆汝爲字玉樵乾隆乙酉拔貢巡鹽御史伊齡阿於丁酉歲奉命訂正曲譜總校黃文李經聘玉樵與分校

丁皋字鶴洲工山水人物尤善傳真著傳真心領二卷載入芥子園五集子以誠姪潤世其家學潤尤精山水人物涉筆古雅不染纖塵少遊廣陵聲價甚重尺

幅可獲十餅金然性揮霍喜交遊所得輒隨手散去魏祖清字東瀾號九峯湯溪人世業醫隨父遊丹陽遂家焉生平潛心經史王樓村式丹劉艾堂師恕交相引重尤喜以長桑術濟人貧者不受值且施以藥所製膏丹名聞京師著有樹蕙編衛生編村居急救方千金方翼註行於世孫曾皆讀書成進士人以爲厚德之報

丁夢蘭字鑑堂居邑之呂城善傳真嘗遊京師賃人肩行李忽逸去莫可蹤跡夢蘭肖其貌張之國門他擔夫至皆曰嘻是某也因悉其姓名索獲之今畫家用

水渲染面目皆宗其遺法

東南紀字佩堂歲貢生耽詩酒精音律行草書入董香光之室而特以蒼秀名其家能爲大幅山水筆意法僧巨然然不肯爲人輕作奕棋亦稱高手以壽終

林佩琴字雲和號義桐嘉慶戊辰恩科舉人學問賅

博尤精於醫嘗著類症治裁一書仿史記倉公傳刊行於世

賀鑑字雲棲工吟詩豪於飲蘊藉善談胸無宿物每爲人作山水羌無底稿惟翻閱唐宋人詩吟哦跌宕或經月許恍然有得則乘興寫之淡淡着色中細緻生

動靜氣迎人賞鑒家以爲畫中有詩也兼曉奇門韜晦不露以無疾終

張有光布衣善奕棋嘗復王積薪棋譜得解着者十居四五當時評爲天下第三手壯遊公卿間性山野不修邊幅輒齟齬而去老益貧困族子考郎傳其技亦以棋名於時

劉福山有待月謠奕存之刻共存三十局

丹陽縣志卷二十四
 工文傳助樂大論論助員助中
 方外
 昔漢武求神仙而茅君遠隱符秦譯經典而羅什吞
 針蓋有其實不欲顯其名而誠於中亦必形於外今
 黃冠緇衣滿天下求一談元說法之侶往往難之矣
 志方外第二十三
 隋
 慧偁住蔣山大歸善寺嘗往揚州謁偈法師偈重之將
 還山偈請現神力偈即從窗中出臂解齊熙寺佛殿
 上額語偈云世人無遠識多驚異吾故不為耳大業

丹陽縣志卷二十四

方外

昔漢武求神仙而茅君遠隱符秦譯經典而羅什吞
 針蓋有其實不欲顯其名而誠於中亦必形於外今
 黃冠緇衣滿天下求一談元說法之侶往往難之矣
 志方外第二十三

隋

慧偁住蔣山大歸善寺嘗往揚州謁偈法師偈重之將
 還山偈請現神力偈即從窗中出臂解齊熙寺佛殿
 上額語偈云世人無遠識多驚異吾故不為耳大業



三年終於大歸善寺

唐

懶融卽法融韋氏子延陵人也入建康牛頭山幽棲寺北巖之石室宴坐觀心有白鳥獻花之異虎狼圍所居四祖攝度之見傳燈錄劉禹錫有牛頭山融大師

新塔記

智巖華氏子智勇過人爲隋中郎將累立戰功武德中出家謁牛頭山法融發明大義得其真訣示滅顏色不變屈伸如生異香滿室

僧鳳延陵人蕭氏子工文翰師粲大師爲僧貞觀中召

主普集定水二寺

慧方延陵濮氏子洞明經論入牛頭山謁智巖咨詢秘要居叢林十年學者歸之復歸茅山將示滅有旛華巨蟒之異門人至已化矣時山林變白溪澗絕流道俗悲慕聲動山谷

元素延陵馬氏子參牛頭山法融遂悟真要開元中韋銑守潤請住鶴林一日有叩門者師曰何人曰僧曰不但是僧佛來也不着曰爲甚不着曰無安汝處後李澄爲揚州牧延去未幾坐化建塔於黃鶴山東原諡曰大津塔曰大和寶航李華銘

法敏姓孫氏八歲出家事英禪師爲弟子入茅山聽明禪師三論悟其宗旨貞觀二年還丹陽講華巖涅槃二年越州田都督追還一音寺相續法輪十九年會稽士俗請住靜林講華巖經至六月有金蛇懸敏項上夜有赤衣二人禮敏曰法師講四大部經功德難量須往他方教化故從東方來迎弟子數十人同見之至八月二十三夜忽放大光明因坐化

元暲姓陶氏雖從釋氏而心存孝愛劉禹錫有送元暲南遊詩並序

羅睺普甯寺僧無雙目而能鑿物大和中鑄銅鐘咸通

中建佛塔屢經兵火不燬人多異之

宋

四世界天聖中寓廣福院每出化緣常潤眞揚同日見之因號四世界後有高僧言其卽日光菩薩聞之卽趺坐而逝

祖可字正平蘇伯固之子養直之弟住廬山後病癩人號癩可詩入西江派劉後村詩話云可詩無蔬筍氣僧中一角麟也

延壽初爲餘杭衙吏買物放生虧欠庫中錢幾半有司鞠之罪當死臨刑顏色愉愉顧謂獄吏曰我活萬萬

生今死竟歸西方豈不樂哉錢王聞而奇之亟釋其罪遂爲僧夜夢觀音以甘露灌其口慧性日明著萬善同歸集數百卷住持雪竇永明二寺壽至九十八合掌趺坐而終

元

優曇蔣氏子出家廬山東林寺後住妙果寺大德間建道場結宗社大興蓮教賜號虎溪尊者

明

師一號無二朱氏子住持甘露寺戒行精專嘗以詩獻太祖曰天人西來乘赤龍手握寶劍青芙蓉出師百萬皆英雄四方上下雲相從斬蛟射鯨滄海中須臾日出扶桑紅波平浪息天無風大船歸來奏凱登九重斯民有賴歌年豐祝聖壽比南山崇邦家永永垂無窮

達觀住海會庵姜二酉紹書襁褓時其父孝廉志魯攜見之達觀贈以舍利子孝廉曰幼子何知此達觀曰藏之有用崇禎丙子三義閣塔成寺僧云必置舍利子於頂鎮之無覓處二酉出之置塔頂光芒上燭者三夜又與賀評事寬祖父善出所藏丁雲鵬佛像百餘幀示之達觀題火燄觀音火不燒火是謂眞火末

署云臘月八日題時評事未生也後評事家臘八日失火他珍玩皆燬惟像獨存其先見如此

慧昂號東明王氏子先本仕族年十六師經山寺佛朗繼禮僧寶藏得悟永樂間入錢塘古道山住持宣德十年敕賜東明禪寺第一代開山住持正統間說偈示寂年七十

米納本姓賀名迓衡邑諸生少負異才與兄煙叟有二難之日甲申國變後祝髮為僧

生庵字合虛本姓賀名汝第太僕王盛之子邑文生性至孝母錢氏與太僕不合因隨母居外家乙酉王盛殉國難遂雉髮為僧

國朝

達瑛字慧超號練塘工於詩淮海英靈集云練塘上人主席棲霞後習靜菟灣精舍罕與外人接見時呼為懶僧與焦山巨超萬壽寺悟需相唱和洪稚存太史亮吉王柳村徵君豫並序其詩刻之名三上人集

晉

葛洪字稚川仕晉為勾漏令其地多丹砂相傳丹井在灣頭今紫府觀亦有仙翁壇

梁

許穆字思元一名謚起家太學博士歷給事中散騎常侍值簡文晏駕習靜山廬嗣上清第三代真師

許颺字道翔穆第三子居雷平山密修上道以太平庚午詣北洞告終爲四代宗師

徐公休宗真館主有道術德望素著

陳

馮法先字法遠元嘉元年文帝遣中庶子詣法遠建大齋每禮拜鐘輒自鳴誦步虛聲亦然

唐

桓尊師字探花學仙術於雲陽觀時人稱其道行開元

十四年尸解碑在仙臺觀褚遂良書今存其半

沈廷瑞彬次子有道術嗜酒卻粒寒暑一單褐數十年不易跣行日數百里林棲露宿多在玉笥浮雲二山不知所終

韋景昭精究儒術不取科第獨慕神仙事初度於延陵尋真觀後居長安蕭明觀天寶中歸茅山敕建紫陽觀居之貞元元年十一月癸卯召弟子曰吾昨見仙官持敕書召任上清仙伯不復住世矣來何爲喜去何爲悲汝等體之毋或哀戚遂化年九十二

吳法通茅山十七代宗師有文學試不利入茅山修道

乾符中僖宗遣使授大洞錄賜號希微先生年八十
三入巖洞失所在

宋

張紹英爲道士不入城府徽宗思接方外屢詔不起遣
中使齋詔入山賜號明真先生年七十五坐化

吳元靜住明真觀徽宗賜號妙明真人

湯志道茅山三十七代宗師少讀書負奇氣鬚髻跣足
坐大茅頂三十年淳祐五年召赴闕禱雨師曰雨不
須禱上曰亢旱奈何曰陛下憂民若此雨當旋至是
夕果雨上大悅民皆曰湯仙雨也召住太乙宮力辭

還山寶祐六年正月三日召門弟子至一笑而化

元

翟志穎字同叔茅山四十二代宗師年十八入華陽洞
遇道士坐石上指石壁題名曰汝姓名在宗師之列
回顧石壁失其人後果傳印劍號觀妙先生

步祐號梅溪西鄉人少好仙術禱雨立應不知所終
鄧自明字德誠元至正時修道茅山元符宮洪武十六
年舉除本宮華陽洞靈官給授印信掌行符錄爲上
清四十九代宗師

任自垣元至德時修道茅山永樂四年詔赴文淵閣修

重刊陽明志 卷之十四
書九年除道籙司右元義十一年敕往天下尋張三
丰授太嶽太和山提點領諸宮觀事後宣德中敕專
提督武當山事表進武當山志十五卷

劉海未詳何時人家於縣西斗門橋父母死無力營葬
嘗棲息南門外之仙臺觀夜見井中有大蟾戲丹吞
吐上下光爭日月海就吸入口蟾死適於院內拾得
金錢數枚將錢穿弄蟾忽躍起遂取錢出門逾歲歸
告鄰戚某日葬其親至期戲錢如故人怪其誣少頃
負蟾揮塵引柩而行空中如有推挽毫無阻滯達壙
所封土畢不知所之

明

尹蓬頭不知何許人客邑丁氏蔡氏最久手持一杖披
羽袍叩其由來不答問其年則曰歷紹興以來三百
十有一歲矣能駕空遠遊片時往返數百里又嘗翻
卷溺器洗之吳郡守林世遠聞而異之召見默不答
惟曰吾宋人於今何見尋遁去後有遊天台者見之
或云在雲南騎鐵鶴上昇矣留治髭瘡方又治小兒
疳疾方神驗

潘道泰號無涯子郡千夫長潘某從子也年八歲爲萬
壽宮道士巫得真弟子幼遇異人授以法一日登廁

誦咒誤召辛君辛君忿以火筆燃其頭頭癩人皆呼
爲潘癩頭冬夏一衿嗜酒食犬月時酣飲肆中醉執
小兒手就錢上書一雷字令固握之撒手雷鳴景泰
間旱郡守郭濟命禱雨約時日命備火酒及棉被黑
犬道泰登壇飲酒抱犬以被覆臥日中斲齣約時將
至烈日如故郡守命呼之道泰覺曰何可呼我兩處
社令未至惜雨弗遍兩郡耳握劍焚符揮叱四方陰
雲驟合雷電交作郡守以下皆立雨中隸人張蓋道
泰叱曰官將何不去之霹靂一聲皆飛舞空中官民
震恐俄頃雨足郡守冒雷雨病瘡道泰往視以掌撫
其背卽愈維揚屬邑旱召道泰往禱命置一大黑鯉
於釜中炊之火愈熾雨傾如濤眾皆望見雲中黑龍
蜿蜒雨霽啓釜視之水寒鯉游泳無恙也真州婦難
產求道泰符適在市中食犬月卽以犬骨一命握之
令勿示人歸擲牀下其人渡江語同舟人人笑曰此
狂怪誑汝也其人慚投犬骨江中霹靂震空至家兒
已產矣問其故曰偶聞雷聲卽產人有疾求治者書
符咒水喫之隨愈道泰幼孤撫於姑後姑家設醮命
主醮事觀者如堵道泰俯伏起曰某獲譴矣眾中有
孕婦帝回鸞矣越三日逝及葬舉棺如空有人自武

林來見道泰道遙湖上蓋卽其尸解日也後奉璽書
追封通元五雷法宮靈濟真人

國朝

張學景居茅山監齋院嘗有登積金峯詩云石磴盤空
上松濤萬壑吟偶因尋藥至不覺入雲深樹密藏丹
室泉飛掛碧岑始知仙境寂終古滌凡心

謹案釋道一也當以時
次舊志分錄今仍之

流寓

古之人擔囊負笈千里游行凡以廣師資增學識也
陽邑地處通衢土風朴厚自來賢士大夫往往流連
山水來作寓公一釣一游地因人重採而輯之可以
知流風餘韻矣志流寓第二十四

晉

束皙字廣微元城人篤學工文補笙詩六篇撰晉書帝
紀十志著文賦論釋數十篇備載元城集武帝時由
博士遷尚書郎見趙王倫用事知其必敗辭疾歸遊
江左愛丹陽風俗樸素留連不忍去遂遷居焉

齊

劉瓛相人棡六世孫也篤志好學博通訓義五歲聞舅
讀管甯傳曰此可及也與兄璡弟璣共處蓬室讀書
不輟丹陽尹袁粲薦爲秘書郎不用瓛素無宦情自
此不仕齊高帝召見問政答曰政在孝經宋所以亡
齊所以得者此也帝曰儒者之言可寶萬世又問革
命物議對曰若戒前軌加以寬厚雖危可安如循覆
轍雖安必危欲用爲中書郎使何哉喻旨瓛辭之瓛
儒業冠當時梁武帝嘗事之天監初詔爲立碑諡曰
貞簡

唐

朱放字長通本襄州人隱於越之剡溪貞元初召爲拾
遺不就與延陵皇甫兄弟相善復移居丹陽有山中
謁皇甫曾詩

權皋天水略陽人舉進士爲臨清尉安祿山辟幕府詐
死脫歸永王璘舉兵詭名以免元宗嘉之擢監察御
史表爲行軍司馬召拜起居舍人及著作郎俱不就
卒贈太子太保

權德輿皋之子皋徙居潤州之丹徒至德輿遂移居丹
陽相傳權文公故宅在練湖上有自楊子江歸丹陽

初遂閒居詩子璩亦居丹陽

張祐清河人以曲阿古澹有南朝風遂於曲阿之橫塘築室種樹而居焉

宋

石延年字曼卿宋州人寓居五月范堯夫贈以麥舟遂歸葬三喪後卒於京師歐陽文忠表其墓○按曼卿暫居丹陽只得在流寓之列明末府志誤收入鄉賢乃其後人居丹陽故耳

劉景洪劉用霖劉用森先世宿州人高宗南渡祖襲扈駕來江南兄弟並擅才名有遺稿人稱爲劉氏三先

生云

周孚字信道濟南將家子避亂南徙家於呂城登乾道二年進士終真州教授辛稼軒師事之輯其遺集二十卷

岳霖忠武王少子王與長子雲爲秦檜所誣陷時邑人貢文憲爲獄吏潛挾霖逃歸丹陽孝宗時詔食邑宜興霖生四子三子珂爲丹陽宰建祠於南鄉之培棠村遂家焉

范寥字信中蜀人遊丹陽遂居焉嘗丐資從山谷游時黨禁尙嚴山谷所與往來者皆歸獨寥久留不去山

重修丹陽縣志 卷之四
谷詩云范侯來尋八桂路遠避俗人如脫兔爲寥作也

明

劉廷昱江西人從顧涇陽高景逸遊涇陽嘗稱丹陽三大布衣一丁鴻明一任光祖其一則廷昱也

金光宸全椒人福王立馬士英阮大鍼等當國羅織東林諸正人興大獄日遣廠衛伺光宸遂攜家避居丹陽後湖不仕而卒

國朝

朱昌周字肇基休甯歲貢生順治時遷丹陽以畫竹名

兄昌緒以書法名弟昌年以畫蘭名同居練溪稱朱氏三絕

俞金字也僧一字酒人金壇人居後湖墅號練湖漁者工詩善山水人物

錢邦寅字馭少丹徒諸生與丹陽賀拓庵寬葛湘湄筠諸名士雅相善遂徙延陵有移居丹陽詩

吳守樾字子霄江西人贅滕村姜氏遂占籍爲邑諸生詩才清麗嘗與姜元暉大澄南埜大申相唱和

周過庭字子訓本姓過蘇州人教諭過於飛之子占籍丹陽周氏補博士弟子員旋食餼康熙己亥歲貢生

詩載曲阿詩綜

張蘊字耐圃太學生由常州流寓丹陽幕遊燕冀晚遊浙閩詩名動公卿間

董達存字華星常州人乾隆壬申進士寓居呂城著堪輿書甚富精六壬奇門術相宅尤神驗人稱為董仙翁卒葬惠安寺前

丹陽縣志卷二十五

義舉

文正義田瞻族堯夫麥舟助友千古稱焉我

朝於民間慨助鉅資多以樂善好施褒之重勸善也至若急人之急難人所難有類於朱家郭解所為要亦可以風勵薄俗矣茲因舊志孝義析而為二而附以各善堂以類從也志義舉第二十五

宋

徐耕延陵人元嘉二十一年大旱耕助米千斛有司上其事詔書褒美用為縣令



重刊大邑縣志 卷之三
一
蔣鈞字公秉本洪氏子幼喪親歸桐村蔣氏冒其姓官甯國路儒學教授嘗置田千畝爲義莊以廩二族之衆隣里之貧者喪葬嫁娶亦多給之

胡中行太學生陳東諫死僕皆避匿中行適由鄉貢至太學慨然謀於四明李猷護其柩以歸

諸葛埴字子直屢舉於鄉晚歲以特奏召授安豐主簿江甯府糧料院居鄉倡義役息紛爭里人化之

明

吉貴和洪武四年詔立糧長人無敢應有司交章薦貴和貴和乃召里中父老曰天子仁聖今吾代若爲糧

長若屬有所苦吾當白於吏以聞於天子有過吾請獨任之衆曰吉某爲糧長吾屬忍累之哉輸粟者踴躍畢集貴和督運至京見帝陳民間疾苦具道樂輸之意上爲霽容授邵武同知涖任之日曰別駕佐刺史宣上德意教養生民吾可負厥職乎因其地講求農田水利興立學校使諸生課習其中士民德之建生祠祀焉郡旣治旋乞歸

賀愷字伯元督濬九曲河旬日竣役值歲饑詔民出粟及格者予旌愷獨出粟辭旌天順中歲又饑愷輸粟益多辭旌益堅有司高其義虛賓席以待終不赴遇

蝗災獨不犯愷田人以為厚施之報孫玘亦以輸粟及格授承事郎嘗充糧長一人輸賦畢有戚容詢知為鬻女故還所輸令贖女代之納賦

貢原懋字世德正統間歲饑出穀二千石賑貧者有司以聞敕賜獎諭又建學舍延名師以處四方之士孫明輔字叔甫亦好施尤究心濂洛之學

賀鎬字汝周入太學授中城兵馬司副指揮中官勢家憑城社為奸利鎬籍諸豪名上御史治之嘉靖庚戌寇薄城下上官檄鎬襄軍事倥偬經畫咸有條理家故饒兄弟友讓辭多受寡嘗置陸族田以贍族公議

田以奉祭以子邦泰封承德郎

汪瑄字國獻宏治五年夏大饑出粟賑之全活甚眾

汪錦字伯文有以洲田質千金者期至秋償及秋田盡坍沒欲鬻子女伯文不忍燬其券

荆樹開義學以訓鄉族子弟多所成就歲饑發粟賑貸一方賴以全活有司嘉其賢七舉鄉飲皆不赴子文奕文炤姪孫光裕皆登甲科

賀鐘字汝宮家羨而好施置義田贍族婚喪力歛者咸有所資歲饑發粟以賑遵例授饒州照磨因母老請歸

重修丹陽縣志 卷之三十五
吉祐何仲華成化中有司勸賑各輸穀濟民給七品散官

賀學文字知本父邦泰之官學文居家侍祖鎬力行施賑飢寒死喪之家咸賴周給族中貧不能婚者助之曾一月完娶十四人入太學授河南都司經歷從弟學裘亦慷慨好施

賀學古字知敏太學生授山西行都司經歷積書數萬卷教四子一孫皆以科名顯荆谿令王咸所設義倉需學古地曰此曠典也卽捐之邑令曠鳴鸞欲鑿渠令江水自京口注陽壩以紓其勢學古田當其地卽輸捐八十餘畝今所開運河建塔置三義閣處卽其地也後家中落猶好施不倦

賀懋勳字麟伯附貢生授邵武經歷爲諸生時族僕盜池魚杖而病死訟於官議抵其叔罪懋勳語父曰叔以髻年斃重罪大人暨諸父何以自解乎不得已用某抵法可父然之遂坐黜後以事白免

賀懋瑩字爾玉天啟甲子舉人好義樂施凡艱於婚喪者周之恐不速值歲大祲開倉賑卹自冬徂春至二麥登場乃已懋瑩歿妻吳氏承夫志亦好施予

姜志魯字景尼萬曆庚子舉人少機警嗜讀書屢躋公

車而聲名藉甚故交何棟如以忤璫逮下詔獄志魯計借至都不避權闖力爲救解其年竟不赴試士大夫皆歎其高詣仕至工部屯田司主事

賀儒修號天遊崇禎辛未進士知成都縣調巴縣忤直指劉宗祥罷職周延儒當國屢詔不起南都建補上林苑丞馬阮門客有陷以顯秩使甘心於黃道周張國維者儒修曰二公乃心王國吾職小恨不能薦奈何反陷之雖三公不易吾介也調補國子監助教知時不可爲乞病以老

譚功甫傭書爲業偶行路得遺金須臾失金者至問其

數相符盡還之

國朝

蔣清明季諸生負才尙義俠自言少時挽二石弓爲健兒第一嘗徇友人急餽橐走京師日行二百里卒出其人於難

楊日進性和易好施延名醫治善藥以恤貧病鬻治道路賑濟鄉里時稱長者子志遠自有傳

楊其昌康熙十八年捐米五百石助賑巡撫慕天顏給額旌之

丁晉玉農家子能好士雍正二年畢柯山自衢州來丹

陽寓居甘露庵患瘧晉玉延至其家柯山託姓章晉玉謂其婦孫氏曰章先生吾弟也爾事之如叔湯藥自進之無失宜無逾節孫氏賢如晉玉教柯山病日篤潛託人輿徙甘露庵未數里晉玉追至曳車旋曰君恐以死累吾耳瘠田二十畝五日訟三日賭立盡矣君無累吾義柯山乃還病良已

景維英字耘石邑龍墟村人有膂力尙俠義順治初里中無賴子相率爲盜招維英爲之長維英毅然拒之且嫚罵其無行一日諸無賴至柵口見停舟之資重者以敗履識其處入夜將行劫舟人察其情潛移之

鄰舟鄰舟爲某都統諸無賴驗履冒進艙內挺矛出衆卻而走日恨不令景大漢來因是府縣行文皆索景大漢維英曰寃哉然承之我不承之亦我也何必更累多人遂詣縣自任讞既定久之大吏廉其枉特雪之維英旣赦歸適前林有虎嘗白晝攫人維英獨持水車軸俗名千人軸重數百觔往遇虎咆哮來撲一擊不中再擊殪之村遂無虎患

賀錦飛字吉雲邑文生北平馬元敏督學三秦聘錦助校閱署中多鬼物爲祟或聞空中人語聲每夜臥輒入寢室相詬厲馬達旦不能寐錦請易室臥終夕安

重刊丹陽縣志 卷之三
六
寢無他異一日偶便見白骨無算驚且惻然從者曰
此臬司某公署也闖賊破城某公闔門殉難及今無
斂之者錦爲具棺瘞其骨是夕錦及馬夢見數十人
頓首謝自是崇遂絕比卒事辭出署諸文士拉錦過
平康巷一婦白皙姣好牽帷哭甚哀諸少年物色之
哭愈厲錦曰主人拒客如是情必有可憫者因問故
曰我秀才婦被響馬掠賣至此諸君皆秀士何不憐
我而全之因具道其夫姓名錦約曰五日內汝第以
死拒人吾力能全汝且令汝骨肉相保聚即走騎告
督學檢視案牘果得其夫姓名督學立飭有司取婦

人及生并父母鞠之始知其夫館穀百里外婦歸甯
道遇響馬掠去父母疑婿之殺其女也獄久不決於
是一訊釋之復其夫爲諸生夫婦感泣拜謝而去

林培字天育悅親信友仗義疏財妻丁氏事姑孝待妯
娒以和乳遺孤如己子見饑寒者推食解衣不少吝
林嗣禹字錫成培長子康熙四十七年邑大饑出麥七
千石助賑五十九年捐修文昌閣雍正二年復開育
嬰堂捐出三千餘畝十年修萃秀橋捐銀一千五百
餘兩遇有義舉皆爲倡首巡撫屢旌其門

林嗣益字虞可培三子慷慨仗義建南門大橋北門馬

橋浚城河自斗門橋至西水關復捐修文昌閣歲旱出粟散給鄉里生平不忘母訓年八十餘言及母氏輒流涕

袁樹基家綦貧而制行純正義利之辨尤嚴嘗於路旁拾得百金坐俟其至還之

王景瓚太學生事親孝母鄴氏年近八旬值晉豫饑人相食母聞之謂二子曰汝輩可坐視耶其以吾身後之費先助賑可也景瓚及弟景琇立捐五百千總督沈葆楨給與樂善好施額事聞景瓚議敘得國子監典簿

王甘霖儒家子性慷慨母何氏年八十餘聞王鄴氏助賑謂甘霖曰吾不可以後之因出番銀六百圓以母命報賑當道皆給匾褒獎他如城工文昌閣及文廟祭器無不慨助多貲

各堂院附後

普生莊康熙四十七年巡撫于準捐買縣西田四百九十九畝收租完賦外解府庫給京口救生船用每年冊報工部

育嬰堂康熙四十六年殷聖莊葛任義等倡捐在妙覺寺內賃房收養後因乏資停止乾隆二年總督趙

巡撫高闕將林嗣禹東天瑞原捐田畝歸育嬰堂收租給發乳食責令董事端管經理歲底造冊報銷乾隆十三年將法華庵廢址修葺完固改作育嬰堂林嗣禹所捐田坐落丹徒縣抵額細民洲濱江坍漲靡常原報捐田二千五百二十二畝零埂五百五十畝零灘一百六十畝雍正七年大丈沖沒田三百四十畝九分埂八十七畝八分現存實田二千一百八十一畝零實埂四百六十二畝零又乾隆十三年大丈開墾成田四十二畝零東天瑞公田坐落丹徒縣大益村山岡原報田塘一百一十三畝零又董事續置

田九畝二分東玳捐田二百九十八畝零坐落丹陽縣東洋橋寶莊廟山岡又光緒十年附貢生林廷傑助送門面三間第二進平房兩間第三進仍有基地坐落城西寺前鋪以上租息董事收採易價備用按年造冊報銷

養濟院額設孤貧一百名每年每名月給正銀一錢七釐七毫八絲閏月銀二釐七毫正米二斗三升八合五勺閏月米一升九合九勺

崇節堂乾隆四十一年邑監生賀培高郭榮錫捐錢二百千以濟窮嫠名曰恤嫠會原有續置市房產業庚

申之亂盡成瓦礫同治五年邑令金鴻保照會邑紳徐錫麟任履南孫清楫東允泰周雲錦等募捐將續置之產以次起造並勸各鋪戶量力捐助照章給發經費日漸盈餘改名崇節堂其續置恒產並邑中樂善之戶助送市房一在西門大街金斗鋪門面三間內進平房五間大園一方前後廂披兩廈園外仍有餘地又大街民義鋪門面兩間內進平房兩間廂披兩廈又北門倉巷上岸新橋鋪門面三間內進平房三間廂披兩廈又賢橋口西鋪門面一間又南橋下安鎮鋪門面一間內進平房一間第三進仍有基地

又西門城外金斗鋪門面三間後園一方又中市大街民義鋪門面一間捲篷一架後進平房一間又大街民義鋪門面一間捲篷一架後進平房一間後有基地九間水井一口又大街太平鋪呂鏡昌助送大門堂一衙第二進平房一間第三進大庭三間一衙庭後捲篷一架廂披一廈又添置太平鋪孫姓東首基地一方平房一間第四進住屋平房三間廂披兩廈又南橋下安鎮鋪門面一間內進平房兩間第三進仍有餘地又小東門廣濟鋪門面基地一間內進天井一方屋基一間又梭羅巷東寺前鋪門面基地

兩間後進基地一方以上房租俱係周雲錦採收照給歲底刊刻徵信錄普告同人

儒齋會同治八年正月加給儒齋至十二年邑令葛兆堂撥公項錢九百千文歸崇節堂存典生息永作優恤儒齋之款仍歸崇節堂一手經理

敦樂二善堂道光八年邑監生裴汝楫林懋楊德昌林肇盛等共捐洋四百元在邑東嶽廟設斯局施棺同治五年邑令金鴻保照會邑紳徐錫麟孫清楫束允泰等仍照舊章令各豆行按石抽收捐款並勸樂善各鋪戶量力捐助以襄善舉光緒十年邑令陳炳泰

又諭勸在城錢土莊每月捐助錢十四千文絲行每年捐助錢七十千文以補不足始得復舊

效仁堂道光十三年邑舉人束澧甘步金廩生丁鎮文生郭兆祺楊嘉樹醫學袁鑑寰等稟請設善堂專埋水陸斃屍由地保報縣驗明以免民累舊有原額田十三畝零坐落大南門外官莊村光緒年間邑庠生冷兆甲查出熟田七畝零又雙井巷市房一間半又南草巷市房三間後園一方又大寺西梭羅巷東首基地十餘間每年俱係經董採租辦理

惜字會在東嶽廟內舊有新橋鋪坐西朝東平房兩間

半採租津貼復城後仍舊設爐收買字紙焚化諸會友集資續置南首管姓平房半間修造共成三間又續置安鎮鋪坐西朝東基地三進計五間新造門面一間披兩廈第二進平房兩間又楊荆氏助送縣前鋪門面一間光緒五年修造文武殿大門並左首房屋一間以爲惜字公所十一年帝君會內增貢生林澄文生姜聲霈邀集會友重建文武殿惜字會助貼英洋二百三十元

積善堂惜字會道光十年埤城鎮職員王修五等邀集地耆募捐設爐在眞武廟東首置樓房上下一間前

進平房一間收買字紙焚化送江並續置田四十四畝五分

義渡在東門城外萬善寺前自萃秀橋移寶塔灣下道光二十九年邑人孫慶堂周有容林肇祺等倡捐設立義渡置伏字號田三十一畝有零採租給發渡役工食庚申之亂船燬至同治九年經丁坤周有容林肇祺夏汝楫賀茂等募捐復設並置惠政鋪首甲坐東朝西門面一間後進平房一間光緒十一年船隻損壞經夏汝楫程子文丁炳甲馬雙桂等募捐修造立有碑記

重刊陽東志 卷之三
保嬰局同治十三年候選訓導余治等募捐二百千文
呈請在北鄉新橋鎮永遠橋關帝廟東首建造房屋
三間爲給發嬰孩乳食之所局中經費始則募寫月
捐繼因蔡姓團六兩沙大小兩墩額外有蘆草泥灘
一千八百餘畝經職員張以襄等繳價承買每歲採
租照章給發嗣因局用支絀張以襄助錢四百千文
陳燧助錢三百千文賈鏞助錢一百千文無名氏助
錢二百千文以資津貼通年收支各款均由經董造
冊報銷

進修堂在北鄉埠城鎮同治六年職員王樹昆邀集地

耆助送受字號田十五畝二分並真武廟前東首坐
北朝南捲篷門面兩間又助錢三十千文呈請設立
文會按期會課分別獎資立有碑記

薰德堂光緒七年監生王燮堂等在北鄉埠城鎮稟請
撥本鎮典捐錢五成設立善堂施棺收埋水陸無主
屍骸並勸各善戶量力捐助均歸經董王燮堂管理
生息置產王燮堂並助送愛字號田三畝二分永爲
義塚土名黃土段

義塚明洪武間禁焚尸令郡縣貧民無地葬者所在有
司擇近城地寬闊處立爲義塚一在北門外觀音山

計地五畝一在南門外大士庵旁計地三畝一在西門外演武場計地五畝

國朝雍正十二年邑庠生錢機捐地一畝六分三厘坐落東門外青陽鋪乾隆二年邑民盛懷珩捐地一畝六分坐落東鄉珥陵鎮靈山廟僧看守光緒十年邑庠生冷兆甲在東門外分箕頭添買地出字號田二畝一分河頭段伏字號田二畝立有碑記

大會...

...

...

